

十五、傅氏

蛟洋傅氏族譜

蛟洋傅氏族譜，爲舊同學傅思傑君所鈔寄。其譜三修於光緒三十一年，主事傅蔭堃、傅述堯二先生，頗博洽可佩。據傅君信云：『查興寧散族，即來自蛟洋者，（屬福建上杭縣），到邑迄今，已有二百餘年。現在族人，每年須到上杭享祖。在邑散族，前時多居在城，科舉時代，讀書成名者，頗不乏人。現今多移居各鄉，統計約一千餘人。』今就斯譜所載源流世系，及遷移轉徙諸事蹟，摘錄如下。民國二十年（一九三一年）三月一日，編者識。

吾傅氏自有商高宗、感夢求賢傳說於版築，說實爲我傅氏之鼻祖。厥後世遠年湮，蔓延宇宙，有以天授之才，佐漢高，位列元功，封德鄉侯諱寬者，爲鉅鹿一派；有以奉命責夷，誅斬樓蘭，封義鄉侯諱介子者，爲義渠一派；有以武勳蕩平篡賊，名標雲臺，封昆陽侯諱俊者，爲清河一派；有以博覽羣籍，授書天祿，封明公侯諱毅者，爲茂陵一派；有以椒房親戚，不趨權貴，歸隱嵩山，屢召不起，封高武侯諱喜者，爲襄陽一派；有以慷慨直諫，不附權閹，出守漢陽，捐軀殉難，諡壯肅，爲護軍司馬諱燮者，爲廬州一派；有以博學宏詞，貴遊震懾，臺閣生風，封清泉侯諱玄者，爲慶陽一派；有以循良，歷官縣令，各著異績，咸稱傅聖，封新亭侯諱琰者，爲寧夏一派；有以正色立朝，排黜異端，

爲太史令諱奕者，爲鄴下一派；有以職任宗伯，旋歸田里，天子賜敕，高風寥寥，千古莫嗣諱霖者，爲青州一派；支繁派衍，難溯其源。及我祖念七郎公，自宋來杭，爰居蛟洋傳凹頭，則公又實爲蛟洋鼻祖也。而派溯清河、歷元、明、清、以至今，傳世二十餘代，其支派雖分，而本源不紊。迨乾隆癸丑，鄉中賢老，議修族譜，玉江退齋二先生，慨然以總輯譜牒爲己任，旁搜博採，崇信闕疑，斷自念七郎公爲始祖。辛酉付之梨棗，則源清本正，世系明，宗支辨，遠近咸集，大小畢登，誠盛事也。（節錄卷首道光十六年傅氏二十世孫毓所撰譜敘）。

我始祖念七郎公，自南宋已居閩杭之蛟洋。十四世祖仕鳳公，自杭遷居興寧，實爲英之高祖。乾隆戊子，英忝鄉薦，常返謁祖，淹留累日，族情彌篤。後雖飽繫一官，不獲再瞻桑梓，然耿耿於中，豈忘敬恭之誼。（節錄卷首傅氏十八世孫鄉進士廷英所撰譜序）。

傅氏出唐侯丹朱支子大繇，食邑傅巖，因以爲氏。索隱云：傅巖在虞號之間，以今輿地證之，當在山西解州平陸縣，爲殷相說公版築處，俗名聖人窟。巖，史記作險，殷本紀言武丁得說於傅險，遂以傅險姓之，號曰傅說。由前之說，所謂胙土命氏也；由後之說，所謂因生賜姓也。鄭漁仲志氏族，分得姓授氏爲三十二類，其五曰以地爲氏，有封土者，以封土命氏，無封土者，以地居命氏。居傅巖者爲傅氏，則亦第就其顯然者言之耳。自說公以降，史傳所紀，代有聞人。然當漢魏之間，若陽陵

昆陽等之豐功，若喜若彤等之節義，皆起家秦晉之區。而清河一派，則自北魏而始盛，如融、如豎、如修期，投足行伍之間，置身戎馬之地，汗馬勳勞，焜耀史冊，莫不以清河世胄，嘖嘖人口。李唐時，定氏族，明地望，稱傅氏者，必數清河，蓋從其盛也。由唐迄宋，其最著者，如良弼之建節銀夏，誠之之開府昭義，其爲清河舊族者，無論矣；至若突公之出青州，堯俞之出鄆縣，皆去清河不遠；惟楫公、俊公、及佇、及誠，及大聲、與汝，則衍派於興化；若惟肖、及璽、及烈，則開支於泉州，是傅氏之由西北而東南，由東南而入閩者，固已非伊朝夕矣。然吾祖念七郎公，來自南宋，向無譜牒，祇傳遷由石壁，後乃聞上世爲侍郎公。乾隆癸丑之夏，議立族譜，抵連邑朋口，觀其譜所載：「侍郎公，諱正先，由生員歷任吏部，後以時不可爲，隱居長汀杉樹坑，即傅家牆。先世一郎公，諱以，南宋進士，任太守，由吳抵寧化石壁。生三子：一旦郎、二景郎、三侍郎。另有宗圖，侍作是。侍郎公移傅家牆，生八子，俱以念字冠行，爲名。惟念三郎守祖，餘皆徙。而念二郎移朋口。念七郎移上杭。念二郎第四子百一郎，亦移上杭。」再閱傅家牆譜，無異。按其世數，亦與吾鄉相若。則所傳念七郎公之來自傅家牆，固非無稽。然吾鄉無譜足徵，有志之士，所爲慨然抱憾也已。夫沿討流源，豈容或苟。昔臨川二仙橋傅氏族譜，自說公以下，世次詳明。李穆堂作序，稱爲歐蘇所讓，而不敢據。夫以歐蘇之博雅，而其譜上溯五代而止，僅存歐蘇忿生於譜之前，豈非傳信闕疑，寧隘無濫之志耶。我念七郎公，至今已傳二十餘世，而一脉綿延，猶守桑梓，世口之遠，而不啻親見之焉。故

譜之立始祖，斷自念七郎公，以上則從而闕焉。後之覽者，庶無崇韜假冒，錯認顏標也已。（卷首傳氏十八世潘所撰傅氏源流考）。

按福建上杭蛟洋傅氏，爲客家傅氏中之一支，興寧傅氏，固即由蛟洋所遷出，而今日南海佛山傅族，以至香港傅金城一家，則由興寧縣城后街傅族所再遷。曩歲傅秉常傅金城之祖母李太夫人，在香港去世，上杭蛟洋鄉傅氏合族，及興寧傅氏合族，南海傅氏合族，與興寧友人傅思達思傑兄弟之父家治先生，即爲致送輓聯誌哀，皆可窺見此傅家與蛟洋傅氏之發源關係。上杭蛟洋傅氏合族輓聯云：『近溯汾水，遠溯上杭，知祖宗流澤孔長，傅族歷來多節壽；東至神山，西至瑤臺，嗟賢母遊踪已渺，蛟鄉從此失瞻依。』又興寧傅氏合族輓聯云：『富貴顯華洋，看嫡派兒孫大光同族；啓訃傳桑梓，統寧江子姪遙哭太君。』又傅家治先生輓聯云：『絳帳設香江，當年蘭秀門牆，熊丸勗學傳王母；素衣居梓里，此日釜沉霄漢，靈耗遙臨痛棘人。』而南海縣傅氏合族輓聯亦云：『葉突蔭汾江，知天道必啓祐善人，宜膺壽命百齡，親看綵衣娛暮景；椒蕃衍南海，編史乘更表揚節婦，孰料罡風四月，忽傳仙樂迓慈雲。』（以上輓聯，見民國十八年潘紹棧等編傅母李太夫人哀思錄）。蓋此遷居香港之傅族，初由興寧遷居佛山，至李太夫人夫婦，及其子傅錫，始至港設元利字號，經營建築工程，以業務發達，遂成鉅富；傅錫之姪秉常先生，初畢業香港大學，後轉入政界，官至國民政府派駐蘇聯大使。而傅錫

之子金城先生，則寢爲香港名流。（參見拙作香港早期之建設與打石關係）。故李太夫人於民國十八年去世時，（積閏已九十三歲），港內外人士多聞訃致悼也。而秉常先生輓其祖母李太夫人聯亦云：「嚴親棄養，當志學童年，不能侍奉萱闈，予今忝列長孫，孝道多疏，痛背祖慈應倍罪；弱冠服官，叨全權公使，自愧遠遊宦海，此時得供薄俸，酬恩善教，奠陳尊爵有餘哀。」又金城先生輓聯則云：「以不材重辱愛憐，調護辛勤，點頷含飴，空思李密陳情表；維大母起家慈儉，饗餐淡泊，登堂跪乳，未盡劉殷祝董心。」以此知傅氏初至港時，亦以刻苦儉樸自勵也。